


Vergèten . . ku-j vergèten !

A-j ärgens niet steeds an denken umdät 't niet noodzakelijk is en 't lèven gewoon zien gangegien giet en ie oew normale ding kunt blieven doen, ku-j bepaolde zaken zoas geldigheidsdaotums gewoon vergèten. Maer a-j verloopdaotums vergèet umda-j der nooit meer op letten, ku-j inies raer kommen te kieken as de bewuste daotum **wel** is verstreken. Umdät moeders de vrouwe wat slecht ter bien is doe ik de leste tied wat vakerder de bosskoppen en betale netuurlijk zoas 't in disse medärne tied eurt met plastic.

1-oktober dus ook . . . althans dät wol ik wel graag, maer der verskeen allenig een rood kruus op de pinautomaat . . . wel verdikke. Der zatten niks anders op dan 't absolute noodfonds an te brèken en contant of te rèkenen. Ik adde de bosskoppen toch neudig. Thuusekommen e-k direct de computer an-ezet umme te controleren of mien bankrèkening niet wazze e-skimt en/of e-plunderd.

Wat dach ie wat? . . . Verskient inies 't bericht op 't skärm dät ik met de gebruikte pas en 't rèkeningnummer **gien toegank** ebbe **töt internetbankieren!** Now ik kan oe verzekeren dät ik döör niet vrolijk van wiere. Dan maer preberen een servicenummer te achteralen zonder dä-k eerstens mut inloggen.

Met wat zuken en een umweg van **twie-lang en drie-breed** slaeg ik der in een medewärker an de . . draadloze . . liende te kriegen. Op de vraoge wat de geldigheidsdaotum van de betaalpas is mos ik waerchtig eerstens zuken wöör of dät ston.



Wat blèk . . . **geldig töt** ?

Tsja . . 't was now 1-10-2016 . . en een computer vergèt dät niet . . en dus . . de groeten! Umdät ik de wèken ierveur ook gien post van de banke adde ontvangen wöörin een nì'je passe zol wèen op-estuurd, e-k dus nooit in de gaten e-ad dät dit ston te gebeuren. Gevolg . . Ik binne (nog) niet failliet, maer kan ook niks meer betalen veurdä-k een nieuwe bankpas per post toe-estuurd kriege en disse bi'j 't bankketoor perseunlijk ebbe activeerd. Dus op-epast . . . A-j minder belangieke dingen gewoon vergèet umdät 't allemaole aover langere termien göt . . ku-j wel is de pech ebben dä-j oe normale doen kunt vergèten umdat 't oe onmeugelijk is emaaht deur de geautomatiseerde maotskappi'je.

En die olde betrouwbaere posterijen . . van toen 't nog **PTT** wazze . . **dät ku-j vergèten!**

Resultaoten uut een verlèden bieden gien geransie veur 't eden!

Mien riebewies is gelukkig nog geldig töt 09-2019 dus döör oef ik veurlopig niet an te dänken.

Ik dörve aoste te wedden dä-j strakkies èven naor oew eigen passies kiekht umme der zeker van de wèen dät 't oe niet aoverkump.

1 oktober 2016



Görendrögien W.